

# CONCLOTTA

Official mensual organ del OCCIDENTAL-UNION


Redaction e Administration : INSTITUTE OCCIDENTAL, CHAPELLE (Vd), Svissia



COMITÉ  
DE  
REDACTION :

Prof. E. de WAHL  
(Estonia)  
Dr Bertil BLOMÉ  
(Svedia)  
Prof. J. PODOBSKY  
(Tchecosl.)  
Dr H. NIDECKER  
(Svissia)

Nr. 120  
Serie A  
MARTE  
1938





Desde pluri seculs mult homes provat crear un auxiliari lingue facil e neutral. Li unes basat it principalmen sur li **naturalità** e negliget li regularità (exemples : *Mundolingue* de Lott, *Latino sine flexione* de Peano, etc.). Li altres basat it principalmen sur li **regularità** (exemples : *Esperanto*, *Ido*), e pro to ne hesitat mutilar li international paroles.

Ma, por esser adoptet de omni popules e de omni classes del population, un international lingue deve esser ne solmen regulari, **ma anc presentar un aspect natural** in su radicas e in su derivates. It deve esser fundat sur li **principie del maximum de internationalità** e retrovar li international paroles per su propri regules de derivation.

Li solution de ti problema ha esset tro desfacil pour omni autores de international lingues. Solmen pos 30 annus de provas e experienties, li baltic erudit Edgar de Wahl **successat combinar li naturalità e li regularità**, e formular un systema permissent formar per quelc regules li international derivates.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es **li max facil lingue por li majorité del popules**.

Occidental es diffuset per li **OCCIDENTAL-UNION** quel es neutral in religion e in politica, e per li national societés de propaganda. Li Occidental-Union es directet de un **SENAT**, e del **CENTRAL OFFICIE** durant que li **ACADEMIE** decide pri li linguistic formes.

Li **Institute Occidental in Chapelle (Vaud), SVISSIA**, responde immediatmen e gratuitmen a omni demandes de information concernant Occidental, su scope, su grammatica e su vocabularium, e corresponde in francés, german, anglés, italian, hispan, Esperanto, Ido, Occidental.



Pro quo li nomine de  
"Occidental"?

### CURT GRAMMATICA DE OCCIDENTAL

**Infinitives** : Finale **-r**. Ex. : fini-r, ama-r, deve-r.

**Adjectives** : Finale inobligatori **-i**. Ex. : micri.

**Adverbies** : Finale **-men**. Ex. : visibil-men, regulari-men.

**Present** del verbes : li radica sol. Ex. : tu fini, tu ama, tu deve.

**Passate** : Finale **-t**. Ex. : tu fini-t, il ama-t, noi deve-t.

**Passate composit** : per auxiliare ha-r. Ex. : tu ha finit, noi ha videt.

**Future** : auxiliare va. Ex. : Tu va finir, il va amar, etc.

**Conditionale** : auxiliare vell. Ex. : tu vell finir, yo vell prender.

**Imperative** : ples, o li radica sol. Ex. : Ples finir ! Fini !

**Participie present** : **-nt**. **Participie passat** : **-t**. **Gerundive** : **-nte**.

**Masculin** : **-o**. **Feminin** : **-a**. **Plurale** : **-(e)s**.

Un sol **articul** definit : **li**. Adjectives invariabil.

**Pronomines personal** : Yo, tu, il, illa, it ; plurale : Noi, vu, ili.

**Attention ! Por li abonates de Cosmoglotta :**



## COSMOGLOTTA

**CONTENE:** DISCUSSION: **R. Berger:** *Precision.* — **Erik Stenberg:** *Un «Fush-laboruro» malgré bon intentiones.* — **LINGUE:** **R. Berger:** *Vocabularium del centres de interesse: Vive et morte.* — **O. Jespersen:** *Declaration.* — **LITERATURA:** **S. W. Beer:** *Vive li passate!* — **R. Berger:** *Li old castel.* — *Li terrore che li animales.* — **Karl Federn:** *Li vision de senior de Brion.* — *Ex li «Conversations con Goethe».* — **CRONICA.**

*Ric Berger:*

**PRECISION**DISCUSSION

Pos ancor har declarat que «la aserto aperinta en Cosmoglotta (pri li oferta de 250.000 a Zamenhof, cp. nro 116) similas al rakontaĉo en ordinara romano» (!!!), li revue «Esperanto», pro li pruvas publicat in nor nro 119, es fortiat aconosser li veritá de nor assertiones. In su numero del 31 januar it reproducte in Esperanto nor documentes e adjunte «ni ne pridubas (dúbita) la autentikecon de la dokumentoj.» Ma it dúbita pri li seriositá del negocie e del oferta de Dr. Javal.

Pro quo malgré omnicos suspecter li intentiones de Javal e Lemaire e far creer que ili esset hontosi por Esperanto? Noi ne posse comprender tal malevolent suspiciones contra du homes queles monstrat mult interesse e generositá por li esperantic movement.

Si Javal e Lemaire proposit reformar Esperanto ja in 1906, to es precipue pro li famosi litteres accentuat queles sempre monstrat se un grand impediment por li difusion de Esperanto. Dr. Zamenhof self confesse it a Dr. Javal ye li 3. august 1904, in un lettre quel noi possede e posse exhibir:

«Viaj remarkoj pri la alfabeto esperanta estas tute ĝustaj. La literoj akcentitaj estas tre neoportunaj kaj mi estus tre kontenta se ili ne ekzistus.»

Al Esperantistes defendent ti litteres noi dedica ti confession: Zamenhof self aconosset ti defecte de Esperanto!

Vidente que ti defecte impedi Esperanto esser reproductet in jurnales e que Zamenhof ne posse ameliorar su lingue pro que il es ligat per contracte con su editores, nor du rich Esperantistes Javal e Lemaire oferta le un grand summa ( $\frac{1}{4}$  de million) por liberar le del obligationes editorial e laborar libermen pri li perfectionament del lingue. Pro quo ti «nobil» proposition vell esser bluff, quam pretende li revue «Esperanto»? Li redaction de ti revue self fa memorar que in 1907, Dr. Javal donat 80.000 frs. al Centra Oficeyo esperantistic, e to sin condition. De un altri later, Lemaire, quel esset anc tre rich, donat plu tard mult moné por li propaganda de Ido, a quel il hat adheret. Nu, esque ti du generosi mannes junt ne posset in 1906 donar 250.000 por ameliorar Esperanto in un témpor quande ili esset convictet partisans del reformes? Esque Zamenhof vell har fat un grand viagie til Bruxelles e perdit su témpor si li propositiones de su amicos ne vell har aparet le quam seriosi?



## UN « FUSH-LABORURO » MALGRE BON INTENTIONES

de Erik Stenberg

Li ex-president del Ido-Union, Ing. P. Eriksson, ha dismisset un studie comparativ, quel merite attention quam exemple, qualmen grand diligentie posse producter un labore enorm e van, pro departer de fals premisses e basar se sur conossenties e materiale insuficient.

Si on considera li L. I. quam un compromiss, it esset originalmen sin dúbit intentionat quam un compromiss inter li lingues national-natural. Sr E. in contrari sembla creder, que li scope de IALA es unificar per un specie de aritmetic compromiss, identic o tre proxim a Ido, quelc existent systemas de L. I.

Su tese es, que Ido es li compromiss inter omni systemas de L.I. in general, e inter Esperanto e Occidental in particulari, e que pro to it es max apt quam basic lingue por IALA.

Por prubar to, li autor compara circa 150-200 elementes in 6 systemas, e da 1 punctu a chascun systema por chascun detalie in quel it presenta li solution del majorité. Litteres e sones, desinenties, paroles grammatical, afixes, chascun detalie es tractat con egal gravitá, sin egard al veritabil importantie. A tal mecanic observation naturalmen escapa li comprension del grand principies essential. Li autor ne percepte que, generalmen considerat, Ido ne es un compromiss inter Esperanto e Occidental, ma solmen un variante de Esperanto de quel it conserva omni fundamental principies. In altri láter il ne vide, que in li *procede* del derivation Ido nullmen es un compromiss, ma un extremitá, quel per « logikaleso, renversebleso » e altri Couturatismes oposi se radicalmen a *omni* céteri lingues, national o international, durantque li procedes (*ne li formes!*) de Esperanto e Occidental es passabilmen simil a unaltru.

Un compromiss depende del dat factores. Ci li resultate (Ido) es prefixat (« Petitio principii »), e li factores selectet — secun confession del autor — in secuent maniere: Por constatar quel lingue es max bon « yo detaliatmen comparat Esperanto, Ido, Novial e Occidental. E pro que in sam témpor yo leet noticies pri Esperanta e Novam, yo decidet comparar anc tis. » Do ti efemerice systemas, un variante de Esperanto e un variante de Ido, obliviat desde deci annus, constitue un ters del materiale e have per to un influentie decisiv al resultate. L. s. F., incomparabilmen plu important, es omisset. Tal constellation permisse facilmen arivar a Ido quam compromiss. Un altri selection, p. ex. omission de Occidental e adjunction e Volapük e Ro, vell permissen presentar quam compromiss Esperanto.

Per un litt diagramma li autor demonstra: « La developala tendenco esas konverganta vers Ido. Ido esas quase la rezultanto di movi en konservativa e radikala direcioni. Ido do vere reprezentas la stabileso. » Ne ti subjectiv opinion interessa nos, ma li Occidentalismes



usat vice li corect Ido-formes « quaze, konservema ». Altriloc li autor scri « definiciono, delegaciono » vice « definuro, delegitaro » : su Ego melior protesta per practica contra li artificialitá de Ido, e manifesta un preferentie por Occidental.

Altrimen li ovre abunda de criticas pri Occidental, sin malicie, ma de un superficialitá e prejudicie demonstrant li inseriositá del autor. Il alude conosser « Occidental, die Weltsprache », ma mem con ti libre il ne posset liberar se del usual idistic legendes pri Occidental. Il similea a un historico quel vell basar un studie pri Gustaf Adolf sur militari conzones del armé imperial sub Wallenstein.

Sr E. invita su letores informar le pri erras : plazza e témpor manca nos por corecter chascun, il mey seriosimen studiar Occidental e rescri su ovre. In sam ocasion il va posser reconstituer su materiale de comparison ; nu li principies de Esperanto es representat ne solmen per 3 variantes (50 %), quam in li comparisones de IALA, ma mem 4 skematic systemas es oposit a 2 natural tales.

Un sol punctu del tot ovre posse dar indicationes util. Un tabelle compara series de tecnic términos in German, Anglés, Francés. Ordinat secun li alfabeto german, it naturalmen demonstra un grand analogie in li paroles german, contra divergenties inter li expressiones del altri lingues, composit ex paroles plu international. Ti tabelle (quel deve combatter li international paroles de Occidental) vell naturalmen far un altri impression, si on vell har selectet parol-series secun li alfabeto anglés e francés. Ma it tamen monstra nos que it es util evitar in nor practica un erra imaginat del autor : il sembla creder que Occidental es obligat secuer omni usus francés e anglés, e que it sta sin auxilie, quande tis difere. Ma Occidental, quam lingue antonom, posse combinar li paroles international con maximal observation de util analogies e per to evitar irregularitás del lingues national.

Un grav ne-linguistic ilusion del autor mey esser rectificat : il crede e di que li Occidentalistes certmen vell esser content, si adminim li reformes proposit de Ido vell esser acceptet in Esperanto. Il conosse li adherentes tam poc quam li lingue, e ignora li historie del L. I. Qui vell seriosimen secuer li naiv consilies de sr Eriksson por « contentar » li Occidentalistes, vell esser surprisat trovar che ili un atitudo astonantmen negativ.

Tuchant es li recommendation secuent : « It es un avantage por li yunité esser informat pri li vocabularium del lingues national per aprender li naturalistic vocabularium, ma certmen it es ancor plu advantageous per aprension de Ido praticar logic pensada. »

Un págin de quelcunc idistic argumentation convicte pri que til hodie ancor null Idist ha aprendet pensar logicmen per studiar Ido. In contrari, it sembla que li Ido-ideologie sufoca ti util facultate che su adherentes. It vell esser un calamitá abandonar li yunité del munde a un tal systematic deformation mental.



## VOCABULARIUM DEL CENTRES DE INTERESSE VIVE E MORTE

**VIVE.** — **Nomines** : vive, vital-ità, ente, existent-ie, età, era, fili-ation, genealogie, destin, sorte, fate, carriera, età, infant-ie, puber-tà, adolescent-o, boy, garson, infant-o, adolescent-ie, yun-esse, yun-ità, yun-o, yun-a, yun-etta, flicca, virgina, viril-ità, matur-ità, adult, adult-ie, old-esse, old-o, old-a, ott-ant-ario, centen-a-rio, etc., senil-ità, ruga, — gemell, trigemell, orfan, filio dorlotat, dorlonton, — vigilie, dorme, coche-mare, reva, — retiratie, pension, emerition.

**Adj.** : *Li còrpor homan posse esser* : infant-esc, infant-il, infant-in, yun, juvenil, adolescent, viril, puber, mann-ic, mann-esc, matur, adult, plen-crescet, old, senil, rugat, caduc, vital, minor, de minor età, junior, senior.

**Verbes** : viver, habitar, esser extra lette, esser vigil, vigilar, dormi-r, somni-ar, revar, roncar, dorm-illar.

**NASCENTIE. INFANTIE.** — **Nomines** : maritatie, nuptie, nascent-ie, nativ-ità, natal-ità, embrion, fétus, acucha, acuch-era, lette de nascentie, bébé, suc-on, a-lact-at, involuette, a-lact-ation, anniversarie, die de nascentie, infant-era, nutr-essa, bonna, coche de bébé, infant garderia, asyl de infantes, simplicità infantin, in-nocent-ie, naiv-ità, infantatie, infantil-esse, infantil-ità, pueril-ità.

**Adj.** : nasce-nt, mort-nascet, infantin, pueril, originari, natural, indigen.

**Verbes** : nasce-r, venir al munde, nascent-ar, far viver, vivent-ar, re-nascer, re-viver, re-vive-nt-ar.

**SEXUAL VIVE.** — **Nomines** : amore, passion, inclination, flamme, affection, foy, tendri sentiment, flirt, galant-erie, tendresse, pena de cordie, capricie, idolatrie, amorette, ialusie, constantie, fidelità, in-fidelità, frigore, conquista, caresse, gentil-esse, amic-ità, amabil-ità, cat-erie, bon-tà, egard, comples-ent-ie, gracios-ità, testimonie de affection, dulc-ore, imbrass-ada, besa, relation amorosi, amor-affere, cokett-erie, charm, sensu, sensu-al-ism, voluptà, declaration de amore, — continent-ie, chast-ità, pur-ità, pudore, pud-ic-ità, decent-ie, luxurie, excess, libertin-age, deboche, incontinent-ie, inconvenient-ie, obscen-ità, scandal, in-pur-ità, in-pud-ic-ità, in-pud-ore, in-decent-ie, deboch-erie, prostitution, impudicie, coit-ion, co-habit-ation, castration.

**Persones** : am-ant, amant-es, amant-o, amant-a, amor-os-o, amor-os-a, am-at-o, am-at-a, idol, car-o, car-issim-o, galant, don Juan, seduct-or, adonis, amic-o, amic-a, favorit, amat-essa, metressa, cuple, pare inamorat, deboch-ero, suten-ero, alfons, proxenet, eunuc, castrat, harem, curtisana, hetera, concubina, prostituta.

**Adj.** : ardent, tendri, foll, ciec, platonic, sentimental, brulant, caressant, dolci, miel-osi, comples-ent, dulc-or-osi, ama-bil, libertin, sensu-al, volupt-osi, pur, in-pur, inconvenient, lubric, glissid, obscen, lasciv, debochant, scandal-osi, luxuri-osi, in-constant, flirt-aci, levi.

**Verbes** : am-ar, amor-ettar, in-amor-ar se por, in-passionar se por, idolatrar, arder por, rucular, flirtar, cort-es-ar, preferer, caressar, dorlot-ar, im-brass-ar, besar, bes-ettar, serrar in su brasses, presser sur su cordie, ocul-ettar, a-femin-ar, seduct-er, raviss-er, charmar, copular, dormir con, coit-er, castrar, pud-er, dec-er, deboch-ar, incontin-e-r, prostitu-er, geniter, inconvener.

**MARITAGIE.** — **Nomines** : spons-agie, alliant-ie, union, — civil, religiosi, morganatic maritatie, — demanda de maritatie, promesse de maritatie, marit-antie, notification de maritatie, consenti-ment, publication, spons-ion, celebra-tion del maritatie, nuptie, nuptial ceremonie e benediction, vestes nuptial, nocte nup-tial, notario, contracte, regime del comunità, dot, provision, lineage-stock, corb, nupt-ial annel, miel-lune, doarie, viage nuptial, menage, separation, repudiation, divorcie, maritatie de inclination, de rason, de moné, mis-alliantie, nuptie argent-in, aur-in, vidu-agie, re-marit-agie, celib-atu, adulteration, inleyitim relationes, flagrant delict, in-fidelità, concubin-atu, bigam-ie, monogam-ie, polygam-ie.



**Persones** : pretendent, mari-to, marit-a, spons-o, spons-a, bel-fili-o, bel-fili-a, bel-patre, bel-matre, bel-parente, femina, pare, testimonio, vidu-o, vidu-a, conjunct, doaria, bigam, monogam, polygam, celib, celibat-ario, celib-o, celib-a, divorciat, adulter-ant-o, metressa, concubin-o, concubin-a, fals marites.

**Adj.** : matrimonial, nupti-al, marit-al, marit-ibil, dot-al, nubil, puber.

**Verbes** : spond-er, benedir, dupar, trahi-r, des-honor-ar, dot-ar, divorci-ar, sepa-rar.

**FAMILIE.** — **Nomines** : genere, gente, rasse, genealogie, origine, genit-ura-filiation, parent, parent-ità, patre, patr-in-ità, papà, patr-ette, mamà, matr-ette, matre, infant, puer, puer-il-ità, filie, fratre, sestra, gemel, o-, a-, senior, junior, bapt, bapt-bassin, matrona, com-patre, com-matre, famili-ari-tà.

**Adj.** : famili-ari, genealogic, patr-in, paternal, matr-in, maternal,

**Verbes** : descender, originar, geniter, progeniter, bapt-isar.

**GENERATION.** — **Nomines** : reproduction, multi-plic-ation, creation, formation, genese, matern-ità, matr-in-ità, patr-in ità, mascul, feminin, sexu, fecundation, conception, gestation, formation, parturition, heredità, atavism, genit-alya, genit-ura, embryon, fetus, ove, micre, progenitura, infant, mulatt, mulatt-essa, hybrid, mestizo, — abort-ion, partur, mis-partur.

**Adj.** : genesic, reproductori, prolific, fecund, steril, vivibil, vivipar, ovipar, ovovivipar.

**Verbes** : fecund-ar, copular, genit-er, gener-ar, pro-cre-ar, reproduct-er, ov-ar, acuch-ar, parturir, dar nascentie a, far nascer, a-lact-ar, mammant-ar, dorlotar.

**MORTE.** — **Nomines** : morte, mort-al-ità, in-mort-al-ità, agonie, — morto, cadavre, suicid, suicid-ie, self-mortation, salta mortal, culbut, — luctu, funebre, affliction, tristesse, — poster-ité, epigones, herede, — supervivent, superviventie, resurrect-ion, re-vivent-ie, — sarc, sepult-toal, sarco-toal, catafalco, sarco-coche funeral convoy, escorte, in-terr-ament, in-terr-ator, in-humation, crema-tion, crema-tor-ia, in-cindr-ation, sepult-or, sepult-or-ia, foss, foss-ero, sepulcre, tombe, tomb-eria, — camp, jardin del mortes, — sarcofag, cenotafio, mausolé, epitafie, necrolog, -ie, necroscopie, urne cindral, funebre, funeral messe, monument sepultori.

**Adj.** : mori-ent, mort-al, in-mort-al, cadavr-ic, sepulcr-al, supervivent.

**Verbes** : mori-r, peri-r, agonisar, pend-er, strangular, mort-ar, — esser afflictet, esser trist, portar luctu, — resurrecter, re-viver, re-vive-nt-ar, — in-terr-ar, in-hum-ar, cremar, in-cindr-ar, sepult-er, foss-ar.

## UN DECLARATION DE PROF. JESPERSEN EX LI TÉMPOR DEL DELEGATION

(*Traductet secun li francés version ex Discussiones de Academia pro Interlingua, 1909, p. 39.*)

It es in li natura de un lingue natural o artificial que it existe solmen per e por li homes queles usa it por comunicar lor idés a altri persones. Omni individue posse introducter changeamentes in it, consciosimen o ínconsciosimen. Si il trova nequem por imitar it, su modification mori per ti fact self. Si, in contrari, il trova imitatores o si li sam modification es aplicat de pluri persones índependentmen, it deveni regul gradualmen, in li mesura quam it es aplicat plu frequentmen. It vell esser petrificar un lingue, si on vell voler etablir un sol libre quam un norm ínvariabil por omnes o por sempre. Samli, un sol person o un academie, mem si it vell esser un academie electet per omni guvernamentes del munde civilisat, nequande posse *prescrire* leyes absolut e ínviolabil in lingual materies, benque it posse haver grand autorità por dar *consilies* por li max bon usagie.



S. W. Beer :

**VIVE LI PASSATE !**

It es strangi : ti desir del hom idealisar li passate e inbellar it, ma it es universal. Yo self ha tre amat li 18-im secul, ti secul quel productet li domes nominat « Queen Anne » in Anglia — de un styl tam tranquill, comparat con nor fanfaronant modern arkitektura — e quel anc videt ti gigantes de Francia, li Encyclopedistes, homes queles discusset omnicos, del quaresim dimension til li lingue international. Ma yo save que ti secul anc genitet li francès revolution, quel indica que alqui mancat in li bell societa del 18-im secul.

Ante nelong yo audit un yun mann parlar pri li « old témpor » quande li conductores de automobiles vermen savet conductor les. It esset amusant proque li period pri quel il parlat ne posset esser mult plu quam deci annus passat. Ja li idealisation hat comensat ! It esset droll, ma ne tam tre droll. Yo self vole parlar in un maniere simil pri li period ante li guerre de 1914-1918.

Yo ha leet li historie del lingue international, scrit de Sr Berger, quel aparit in li august-numeró de Cosmoglotta. Yo apartene al posguerral generation e li narration del discussiones por e contra Esperanto dat me un strangi sensation. Quam diferent li monde esset tande ! Li monde semblat pret developpar se vers li utopie predicat del ductores del francès revolution, u vell esser li libertá, li egalitá e li fraternitá e u on vell soluer omnicos per far un congress. Por me it aparet esser un monde simil a tis del romanes de H.-G. Wells. Ti monde Anatole France e Georges Bernard Shaw habitat quam yun mannes : mastro-ironistes simil a ili noi mult besona hodie.

Li plu old letores de ti-ci articul va rider e dir que li monde de lor yuness ne esset specialmen bell : ili va dir que sub li subrident superficie jacet li povritá e li miserie abominabil. Ma ples considerar li monde hodial. Li monde de ante 1914 esset quasi un posmidi : li monde present es simplicmen noctal. Ex li guerre crescet monstrus : depos 1918 it ha esset guerre in quelc loc sempre. (De 1918 til 1938 it ha esset un constant lucta inter democratie e monarkism, comunism e fascism.) It sembla que li monde va nequande dar se un poc reposa. Forsan it es li ultim lucta del Natura contra su conquestator ? Forsan li nocte es max obscur ante li arriva del nov die ?

Talmen yo espera. Ma yo considera qualmen on va regardar nor epoca in li futur. Li monde de ante 1914 fat un grav erra — li historicos va scriir — it perdit 1.000.000 homes. Ma li monde de pos 1918 — quo ili va dir ; Probabilmen just to-ci : « Ti-ci homes solmen indiget li coragie. »

---

**Abonnement a Cosmoglotta :** Fr. 4.— sviss ; Fr. 27.— francès ; RM 2.30 ; Kc 26.— ; 1 dollar ; 4 s. anglés ; Fr. 27.— belg ; fl. 1.70 ; dan Kr. 4.10 ; sved Kr. 3.60 ; L. it. 18.— ; öS 5.— ; 21 Esc. ; 13 respons-cupones.



*Ric Berger :*

## **LI OLD CASTEL**

Yo hat just finit mi studies quande un regissor del circumité de Genève proposit me un officie de controlero durant li vin-recolte, in un dominia quel il vigilat.

Li prevision passar quelc dies de repos in plen campania in un region inconosset de me pleset me strax e yo acceptet li offerta. It esset in comensa de octobre. Li autun hat ja maculat per ocre e rubore li fructieras e li boscos queles covrit li flancs del pede del Jura. Li mild atmosfer de ti melancolic epoca esset por me un ver juida, nam ye li età de 20 annus, on have sempre li anim impregnat de romantisme. Yo mettet me in via allegrimen vers li village de B. in quel stat li proprietá u on besonat me.

Mi function de controlero ne esset desfacil. It consistet in verificar du o tri vezes in un die li quantítá de most quel li vinicultor incava por li proprietario e inscrib it sur un litt tabell. Extra to, on fa quo on vole, on promena del viniera al pressoria e del pressoria al viniera, sempre fumante cigarettes.

Ma ne havente mult inclination por fumagie, yo hat decidet prender mi instrumentes por picter li paisage.

Quande yo arrivat in B., li tempe menaciat devenir malin. Obscur nubes descendet del declives del Jura. Yo intrat in li proprietá just in li moment quande li unesim guttes de pluvie comensat cader. Yo presentat me che li vinicultor quel acceptet me con simplicitá, quam on accepte un person expectat e inevitabil.

Li vinicultor, un viduo con visage cocinat del sole de un calidisim estive considerat me sin amicitá. Apen il respondet me al rar questiones queles yo fat le. On sentit que il esset discontent, despitat. Li annu ne ha esset bon por le : mult labor e un magri recolte. E pos ti omni deceptiones, li proprietario invia le un extrano por controlar li recolte.

Li menage de vinicultor esset cuidat de su filia, un ravissent yuna de 20 annus de quel li attitude reservat e li visage un poc trist intimidat me. Qualmen un tam bell flor posset crescer in ti loc perdit u li vive self semblat esser solmen pena e tristesse. Per illa yo esset informat pri li situation del proprietá. Li vinieras queles su patre cultivat appartenet al Castel del Gracies de quel li alt silhouette erectet se ye quelc distantie. Li proprietarios essent absent li tot annu, li castel restat cludet, ma pro que li piazza mancat in li dom del vinicultor, un chambre esset reservat por me in li castel self durant li du o tri dies del vin-recolte.

Pos supé, yo petit que on mey ducer me strax a mi chambre por dormir pro que li viagies per ped hat mult fatigat me. Li yun fémina prendet li claves e invitat me secuer la. In extra, it pluviat torrentosimen. Li grand árbores del parc inclinat se sub li storm. Mi guidanta intrat in li castel silentiosi e obscur per li grand porta, quel illa apertet per un clave. Quande noi esset in li corridor protectet contra li vent,



li candel esset accendet e li yuna precedet me in li alt corridores. Yo secuet la, trublat de su bellitá. Li chancellant luce del candel clarat su nuc sub li torsade del nigri capilles. To fat me un deliciosi spectacul quel memorat me un pictura de Greuze. Ma sin attenter mi admiration, illa apertet li porta de mi chambre, desirat me un bon nocte e desaparit.

Yo audit ancor li insonor brui del grand porta de intrada resonant in li vacui corridores ; poy dominat li silentie trublat solmen del lontan muida del vent tra li arbores. Yo esset sol in ti grand castel isolat e ne-habitat, sol til li secuent die. Un sentiment de mal-esser inexplicabil invadet me, sin cause apparent.

Lentimen yo glissat me in li frigid drapes, in sam témpor felici e inquiet esser sol. In extra li tempeste continuat, ma diminuet pro li lontanitá : to esset sive subit clamore, sive long gemidas in li superior parte del castel. De omni partes, yo credet audir plenditiv sospires. Por quietar me, yo dit me que in un castel mal cuidat e tam vast it existet certmen portas e fenestres mal cludet per queles li vent penetrat sibilante. Ma mi pensa continuant divagar in ti direction, un curios facte bruscmén revenit a mi mente.

Poc témpor antey, in un altri region, malfatores hat introductet se in un cludet dom e durant li tot hiverne, ili vivet tá, sin avigilar li attention del vicines, omni covricules cuidosimen cludet, cocinant lor repastes solmen in nocte por que li fum surtient del camin ne mey trahir lor presentie.

In mi castel abandonat desde pluri annus, quo pruvat me que null malfator hat introductet se ?

E nu, it semblat me audir bruis plu precis, quasi chuchotagies detra mi porta. On vell posser intrar in mi chambre durant mi somnie, strangular me, assassinar me sin que alqui veni a mi succurse. Li fenestre de mi chambre regardat in li corte del castel, corte isolat. Li dom max proxim del vinicultor esset in li altri láter, tro lontan por que apel posse attinyer it. E in ti tempeste omni apel esset inutil.

In ti moment, yo comensat vermen esser terret. Un frigid sudore covrit mi facie.

Pernoctar in ti chambre semblat me tande impossibil. Yo surtit del lette, vestit me, accendet li candel e decidet surtir strax de ti cise-gurgul. Per li fenestre, null medie ; li altore esset tro grand ; vo vell har ruptet mi gambes sur li pavage del corte.

Yo prendet tande un heroic resolution ; yo surtit in li corridor obscur, li candel in li manu e fat quelc passus por orientar me.

Subitmen, in li fund del corridor, yo perceptet du formes homan. Mi sangue glaciát se in mi venes. E just in ti moment un currente de aer extinyet mi lúmine. Yo reintrat in mi chambre, tremante del cap al pede e cludet li porta. Ma quo augmentat ancor mi terrore esset li constatacion que li serrure have ni clave, ni clud-bolt. Instinctivmen



yo pussat mi lette contra li porta e contra li lette un scaf e yo attendet in li obscuritá, appoyat contra li scaf, pret resister al apertion del porta con li energie del desesperantie. Li pluvie continuat frappar li vitres e li vent muir in li arbores.

Li nocte passat, un nocte terrificant de quel chascun brui es gravet in mi memorie. In matin, fatigat attender li lucta, yo finalmen indormit me sur un stule, mi cap appoyat sur li bord del lette, tremente ye omni son.

...Quande yo avigilat me, un gay sole clarat li sómmit del alt arbores inter queles apparit spacie de blu ciel. Yo apertet li fenestre e videt in li fund del corte li filia del vinicultor lavante linage in li bronn. Ti vision dissipat completmen mi terrores. Pos har remettet li meubles in lor piazza, yo apertet li porta con li resolution ne timer necos. In li obscuritá yo esset sin defense, ma nu li luce, li pace quel reyet partú hat redat me li coragie.

Tamen yo sentit un violent emotion invader me vidente in li fund del corridor li sam homes intervidet in li nocte. Con voce tragic quel resonat strangimen in li castel, yo criat : « Quo vu fa tá ? » Null response. Li personages manet immobil. Yo avansat un poc.

...Tande yo comprendet ! Mi du malfatores esset du statues, grandore natural, du bell statues marmorin. Probabilmen ili devet ornar li parc, ma li proprietario hat plazzat les tà durant su absentie. Li statues subridet sub li caresse de un radie de sole ; un subrise quel semblat ironic e mocaci.

Qualmen yo ne hat videt les intrante ? Naturalmen, li cause de ti distraktion esset li admiration por li yuna. Mi bell vinicultora esset li cause del to male.

Un moment plu tard, yo esset sedent ye li table del cocine. Serviente mi litt dejeuna, li yuna questionat me, forsan per politesse :

— Esque vu ha bon dormit, senior ?

— Ma, tre bon, senioretta, yo mersia vos !

Yo ne posset responder altrimen sin trahir li drama.

---

**Li terrore che li animales.** Li elefant, li max grand animale pos li balen, es capabil conservar un admirabil sangue-frigore. On raconta li secuent eveniment pri un de ti pachidermes appartenent a un circo : durant un representation, un petroleo-lamp cadet sur su dorse e explodet ; li inflammat liquid fluet sur li bestie e fat de it un ver vivant torche. Li elefant comensat saltar pro dolore tra li circo plenat de spectatores. Durant que li terrorisat turb aplastat se al portas, tramplante li infantes, li elefant fat damage a nequi, evitante tuchar quicunc malgré li intensitá del sufrentie. Vi un astonant domination de se self.

Tamen li sam besties da nos exemples de desrasonabil timores : un altri elefant subvertet un tot quarter de London per su horribil muidas pro que un mus, un jolli micri mus hat glissat se in li palye.



Un chassero de tigres, in Siam, hat lassat sol quin gross elefantes, quel timet nul savagi bestie. Il audit les subitmen criar pro terrore : li colosses muit ye li vision de un micri tortug quel trenat se sur li sand.

On va dir : « to es natural, omnicos reptent causa timore ». Forsan. Ma to ne explica li tot mysterie celat in li cranie de un elefant. Talmen, ti enorm animale posse fallir e cader mort subitmen. Si, por exemple, on imposi a it un labor tro fatigant, it perdi coragie, cucha se e mori.

*Ex « Notre Journal » de Lausanne.*

---

### *Karl Federn :* **LI VISION DE SENIOR DE BRION**

Del Tarn al Aude, trans li nigri montes, du stradas ductet abass in li calid valley del Fresquel. Apu un de ili esset situat un vilage ; blanc domes de làpid inter castanieros e fagos, granatieros e olivieros. Tard in august 1632 frappas de cavall-pedes e raslada de armes sonat del monte ; poy deci-six seniores con curass cutin e collares de dentelles, con chapeles plumat e bandolieres, venit cavalcante, stoppat avan li max grand dom e questionat esque li logi hat esset comendat. Ja un altri senior, simil a ili, surtit ex li dom, ridente e salutante, secuet del grand hósped, servitores prendet li cavalles sudant in li bell harnesses e traet les vers li stalles, e con profundissim reverenties li hósped ductet in su max bon chambre li max nobil del seniores, quel esset ancor yun, ma havet oculus fatigat, e quel, quam omnis, portat bucles e barbe puntat ; con gay babillada li altres secuet : un long table esset arangeat, on aportat vin e manjages ; un bell old fémina intrat con reverenties e salutata ; yun visages spiat tra coridores e portas.

In extra, it obscurat se rapidmen ; li seniores festinat ancore, quande intrat li max yun e max bell inter ili (yun esset li majorité) : « Fliccas, féminas es ci », il raportat, « gracil e de alt statura, con splendid eada, li un plu bell quam li altri ; li Gracies deve har fundat ti località ! — Vor Altess Reyal... ! » il comensat, probabilmen il desirat dir alquicos special, ma ti con li oculus fatigat refusat. « Deman, posdeman forsan omni nor peccas va esser judicat », il dit, « noi hodie ne vole charjar nos per noves. — Bon nocte, seniores ! Noi vole omnes ear in lette e deman continuar li via tre temporanmen ! » Il departet, e li altres secuet. Mannes con torches illuminat les li cortes, e precedet les sur li scalieres petrin, up in li larg chambres con li vast duplic lettes baldakinat, durant que altris distribuet se in li vilage.

Tri hores plu tard du del mannes, queles ancor hat sedet ye lor paperes, intrat li balcon petrin avan li porta de lor chambres ; un old con blanc barbe, li altri yun ma pállid e seriosi. Li hala calid del sudic nocte undeat a lor incontra. In li lontanie, trans li valley, lùmines movet along li montes.



« To es li nores ! » dit li yuno. Li altru inclinat li cap afirmante. Musica represset de violines atinyet lor orel. Subitmen it devenit plu fort, mixtet se in canta e tramplada ; poy un porta cludet se claccante, e li son represset se denove. Tra li jardin sub li árbores un figura lucid e un obscur movet.

« Ples excusar me, Monsieur », li yuno dit subitmen e passuat vers li scalier. — « Ples ear, comte », li oldo dit subridente.

Ma li altru restat seriosi. Il marchat tra li corte, in li dom in avan, il tastat se tra li coridores, vers li musica, apertet un porta, videt li musicantes sudant, videt in li medie forsan un decene del seniores, hante secretmen abandonat lor chambres, dansar e jocar con li fliccas. Tra li fenestres il videt obscur visages rigidmen inregardar de extra. Ye su intration un pause nascet.

« U es senior de Conigy ? » il questionat.

« Oh, Conigy ? — Conigy ! Senior de Conigy ! » li altres altmen clamat, « Senior de Conigy ! Senior de Brion demanda vos ! »

It durat un cert témpor, til que aparit li vocato, li max yun del seniores. Distract ridente il alontanat su blond capilles ex su front.

« Esque li cavalles ha esset cuidat ? Esque li mi es bandageat ? » Brion questionat.

« Yo ne save ; yo suposi », li altru respondet.

« Vu ne save... ? Esque vu es stallmastro sub me o ne ? »

« Yo ha desingageat me de vor servicie ! » li yuno replicat obstinat.

« Vor témpor ancor ne ha finit ! » li altru dit, sempre con egal seriosità.

« Bon. Ma nu yo have altricos a far. Vu pardona ! » Conigy respondet ridente, tornat se sur li talones e surtit.

Li altres tacet. Brion stat silent e ne dit necos. Un, li max richmen vestit del dansatores, aproximat se por conciliar le. Brion questionat pri li cavall-servitores, ordonat avigilar les, fat aportar un lanterne e vadet con ili al stalles. Li musica recomensat. Quande il passuat tra li corte, il videt du ombres hastar vers unaltru.

Quande in li matin temporan un tambur trumpetat por depart in li stradas scarp e lapidosi, e li duc descendet li scalier con li plu old seniores, ancor sempre musica sonat, li pállid mannes e féminas stat o sedet ancor con desordinat capilles in li dans-sala. Con excusas ili hastat vers lor cavalles ; li duc esset visibilmen incontent. Li hósped con quel li blanc-barbato calculat, inclinat se incontabil vezes.

In li instant quande ili volet forcavalcar, un fémina gris-capillat jettat se in lor via. « Senior ! Altess ! mi filia ! » illa lamentat, « on ha fat la desfortun ho-nocte ! »

« Un tam old gallina vell dever posser gardar su gallinellas ! » li duc respondet ridente. — « Tu ne posse desirar plu nobil nepotes ! » un altru clamat e jettat la un monete.



Obscur visages regardat detra li forcavalcantes. Subitmen un lápid volat, e un duesim. Du seniores tornat lor cavalles ; on fuit.

Fatigat, morosimen ili cavalcat in li valley. Ye li fluvie, u li altri strada arivat, ili incontrat lor truppe. In lontanie nubes de polve ascendet. Trans li fluvie li prates esset plen de cavalieros. « Montmorency ! » ili criat ; « Orléans ! » li arivates vocat quam response.

Un bellissim cavaliere fat su cavall passar li fluvie e descendet de it. Li duc de Orléans fat lu sam, e ambi inbrassat unaltru. Altres aproximat se, exchangeat lettres, desplicat cartes e fat consilie de guerre.

« Ye Castelnaudary Schomberg sta con poc mannes. Ta noi deman va atacar le e vicer le », dit senior de Montmorency, « e nu noi cavalca til que noi trova a manjar. »

In vésper in su logi in li castell de Beaucaire li comte de Brion scrit un provocation a senior de Conigy ; poy il ordonat a un servitor vider esque seniores de Jouy e de La Mothe-Goulas esset ancor ta ; ili devet transmetter su provocation. Pro que ili dormit, il posit li lettre sur li table, jettat se sur su lette e, fatigatissim, self cadet in dorme.

Frappada ye su porta avigilat le : tra li fenestre li clar matin lucet. Tamen il credet jacer ancor in somnie. Inter il e li table stat un long, pállid monaco e regardat le per oculus seriosi e penetrant. Nu il apertet li bocca por un salutation frigid e trist : « Memento mori ! » il dit. Consternatmen, Brion erectet se demi in li lette, ma li monaco levat li manu e dit mild e tristmen : « Yo save que vu hodie cavalca a un grav battalie : pro to yo veni exhortar vos, que vu memora ho-hore vor peccas, e ne charja vos per noves. Li morte atende partú, detra chascun lápid ; ma it es solmen li morte temporal, ne li duesim, li etern. Batter-se e morir in li combattes de lor seniores es li diventie del nobiles ; ma inreflectentes fa un pecca mortal per assassinar in duelles pro futil motives li propri fratre, quam Cain... » Il tacet, plectet li manus e semblat precar. « Felici ti, quel trova un judico indulgent ! » il dit ancor, fat li signe del cruz super li jacento e passuat lentmen ex li porta.

Consternat, sin mover, Brion regardat detra le. Sur li table, blanc, jacet li lettre a Conigy. Levi flammes semblat flagrar circum it, ili grandijat, ascendet verticalmen ex li table e li suol, flagrat transparentmen e altmen, e in lor medie jacet aliquos pesant, quo il ne posset conosser ; nu il videt que it esset un hom, quel jacet prosternat, ma ne sur li table, ma plu bass, benque supra li suol. Sub li curasse surtit li silk colorat del uniform ; blond capilles cadet del tempie ; il ne posset vider clarmen li facie. Tamen il reconosset Conigy ; un manu pendet ; sub li curass sangue obscur guttat sur li uniform e li franges aurin del charpe de blu silk ; it fluet sempre plu fortmen e colectet se, durant que li flammes serpenteat silentiosimen circum li morto.



In ti moment li frappada ye su porta, quem subitmen il credet har audit durant li tot témpor devenit plu fort ; li porta apertet se, e seniores de Jouy e La Mothe-Goulas gaymen intrat.

Brion, quel ancor sempre jacet in lett, demi erectet, apoyat sur su du manus detra se, regardat les perturbatmen. Ili petit le far saver quo il desira de ili, nam ili, quam sempre, es completmen ye su disposition. Ma il solmen sucusset li cap e questionat, esque ili hat videt un monaco Ili negat. Poy il questionat li altres in li dom ; ma che necun hat esset un monaco. Alor il tacet e excusat se, pro que il plu ne besonat les, e ili foreat astonatmen. Li lettre, quel il hat scrit, il brulat ye li candel apu su lett, poy il questionat u trovar un prestro. On dit le que in distantie de un hore troya se un litt monaciera. Quande ili passat préter it, il descendet del cavall, desirat confesser e recivet li comunion. Quande il questionat, esque un monaco de ci hat esset ho-matin in li castell de Beaucaire, on sucusset li cap.

Quasi in somnie, il continuat cavalcar, detra li litt armé. Alor ride frappat su orel, e il videt Conigy racontant un joc. Il ne posset altrimen : il cavalcat vers il. Li yun mann erectet se in li sedle e regardat incontra il. Ambi salutat rigidmen. Ma quande Brion solmen questionat : « Esque vu ha confesset, Conigy ? », tande li altru denove devet rider. « Ne solmen pri li salute de nor cavalles, anc pri ti de nor animas vu cuida, comte ? » il questionat.

Brion plu ne replicat e continuat cavalcar. Quam in somnie il videt li coline con li blanc mures e domes de Castelnaudary, videt in li agres e vinieras lucer li helmes e lances e brilliar li aqua del fluvie, quel barrat li via, in li calid sole. Ja li unesimes in avan saltat tra li long e strett pont petrin ; il audit li unesim colpes de fusil, videt senior de Montmorency cavalcar con tri o quar altres sur li pontette, saltar super un fosse e cader del cavall ; il videt li comte de Moret, quel hat provat penetrar per un angustia, esser retroportat moriente con epol fracassat ; il videt li tot avanguardie in desordin retroceder tra li pont. Del castell tonnerat li canones ; blu nubes de fum stat super li mures. Il videt li gay seniores, queles hat dansat in li nocte passat, tornar lor cavalles e fuir, e quande on trumpetat retrete, li masse dens e excitat in terrore fluet vers il in virles de polve ; il evitat les per ear in li prates. Alor su cavall pavet e saltat adláter : avan le Conigy jacet sur terra ; un brass pendet, li blond bucles cadet trubli super li pállid facie ; sub li curass, super li uniform de silk e li franges aurin del blu charpe, sangue obscur fluet, colectent se sur terra...

Solmen mult dies plu tard li comte de Brion racontat ti traviventie al seniores de Jouy-Sardini e de La Mothe-Goulas, e senior de Goulas ha notat it in li duant-quaresim capitul de su memories.

Autorisat traduction de Ilmari Federn.



## EX LI « CONVERSATIONES CON GOETHE »

...Yo honora li mathematica quam scientie max sublim e max util, tam long quam on aplica it ta u it es in su piazza ; ma yo ne posse laudar que on vole misusar it ye coses queles tutmen ne es in su dominia, e u li nobil scientie strax apare esser un nonsens. Quam si omnicos vell exister solmen si on posse mathematicmen prubar it ! It ya vell esser stult, si alqui ne vell creder in li amore de un flicca, pro que illa ne posse mathematicmen prubar it a il ! Illa posse mathematicmen prubar le su dot, ma ne su amore. Ya li mathematicos anc ne ha trovat li metarmorfose del plante ! Yo ha travat it sin mathematica, e li mathematicos esset obligat aconosser it. Por comprender li fenomenes del colorilogie on ne besona altricos quam un perception pur e un cap san ; adver ambi coses es plu rar quam on vell creder...

Noi parlat poy pri li scienties natural, specialmen pri li minuciache, per quel li scientistes disputa se li priorità. « Per necos », dit Goethe, « yo ha plu bon aprendet conosser li homes, quam per mi scientific activitá. It ha custat me mult e esset ligat con mani sufrentie ; ma yo tamen joya har fat li experientie. »

« In li scienties », yo dit, « it sembra me, que es inspirat in special maniere li egoism del homes ; e quande ti sta mettet in activitá, tande tre bentost omni debilitás del caractere comensa aparir. »

« Li problemas del scientie », Goethe respondet, « es tre sovente questiones de existentie. Un sol decovriton posser far famosi un mann e constituer su fortun in sens borgés. Pro to in li scienties reye tal rigore e tal sens de proprietá e tal jalusie pri li perceptiones (decovritiones) del altru. In li dominia del estetica omnicos es plu lax ; li pensas es pluminu un proprietá inat de omni homes, e lu important es li maniere del presentation e del execution, e to comprensibilmen ne da ocasion a mult invidie. Un unic pensa posse dar li fundament por cent epigrammas, e li question important es, quel poet ha savet expresser ti pensa in maniere max bell e max efectiv. »

« Ma ye li scienties, li presentation ne vale necos, e omni efect es in li perception. In to hay poc general e subjectiv, ma li singul manifestationes del leyes natural omnis jace sfinxatri rigid, fix e mut extra nos. Omni nov fenomen perceptet es un decovriton, omni decovriton un proprietá. Ples tuchar li proprietá, e strax apari li hom con su passiones. »

Goethe continuat « Ma in li scienties anc to es considerat quam proprietá quo on ha ricevut traditionat in li academies e quo on ha aprendet. Si ariva alqui quel aporta alquicos nov quo contradì o mem menacia subverter nor credo, quel noi repeti desde annus e quel in nor láter noi traditiona a altris, tande on incita omni passiones contra il e prova opresser le in omni manieres. On resiste contra it secun quo



on posse ; on fecte ne audir, ne comprender ; on parla pri it con depreciation, quam si it ne vell valer esser regardat e examinat ; e talmen un nov veritá posse atender long témpor til que it imposa se. Un francés dit a un de mi amicos concernent mi colorilogie : Noi ha laborat durant quinant annus, por fundar li imperia de Newton e consolidar it ; it va oportet duesim quinant annus por subversar it.

Li mathematic clicca ha tant provat denigrar mi nomin in li scientie, que on time solmen mentionar it. Ante quelc témpor yo videt un brochura, in quel on tractat temas del colorilogie, li autor semblat completmen convictet pri mi teorie e hat constructet e fundat omnicos sur li sam fundamentes. Yo leet li scrite con grand joya ; ma con ne litt surprise yo devet vider, que li autor ne mem hat mentionat mi nómin. Plu tard on soluet me ti enigma. Un amico comun visitat me e confesset me, que li talentat yun autor hat volet far su reputation per ti ovre e il hat con jure timet nocer se che li monde scientific si il vell har audaciat apoyar su propri idées per mi nomin. Li litt ovre havet success e li espritosi yun autor ha plu tard personalmen presentat se a me e excusat se. »

« Ti casu sembla me tam plu remarcabil », yo dit, « quam in omni altri coses on have motives por esser fier pri vor autoritá e omni hom estima se felici trovar in vor consentiment coram li monde un protection potent. Ye vor colorilogie it sembla me esser lu mal, que vu ne conflicte per it solmen con li grand e generalmen aconosset Newton, ma anc per su disciplos difuset in li tot monde, queles adhere a lor mastro e de queles li númer es legion. Mem suposit que vu va in fine ganyar rason, tamen vu va restar sol con vor nov doctrina durant un considerabil témpor. »

« Yo es acostumat a to », Goethe replicat, « e yo es preparat a to. » Ma ples dir self » il continuat, « esque yo ne posset esser fier, confessente me desde duant annus, que li grand Newton e omni mathematicos e famosi calculatores con il esset in un decidet erra pri li colorilogie, e que yo inter milliones es li sol, quel save lu rect pri ti grand tema natural ? Con ti sentiment de superioritá it esset me possibil tolerar li stupid arrogantie de mi adversarios. On provat atacar mi doctrina in omni maniere e risibilisar mi idées, ma tamen yo havet pri mi ovre perfat un grand joya. Omni atacas de mi adversarios servit me solmen por vider li homes in lor debilitá. »

Durant que Goethe parlat talmen per un fortie e richness de expression, quel yo ne es capabil reproducter veritabilmen, su oculos brilliat de un foy extraordinari. On videt in to li expression del triumf, durant que un subrise ironic ludet circum su labies. Li trates de su bell facie esset plu imposant quam jamá.

trad. I. F.



## CRONICA

*Remarca redactional : Cosmoglotta es neutral pri politic aferes, do it solmen signala li politic revues o jurnales queles utiliza practicmen Occidental, ma it ne mentiona li contenete. Interessates mey tornar se directmen al respectiv adresses.*

**CATALONIA.** Desde quelc témpor apari un revue exclusivmen in Occidental : « Catalonia in lucta. » Li abbonament es gratuit. Interessates mey tornar se a Occidental-Buró, Macià 5, Figueres, Catalonia, Hispania.

**FINNLAND.** Coidealist J. Saarinen, Mikkeli, ha interpretet li traduction del finnic national epos « Kalevala ». Li unesim cant (de 50) es finit; li traduction es de considerabil literari valore, e demonstra li enorm utilitá de Occidental quam lingue traductori international por li literatura national de litt lingues. Ci li avantagie del immediat comprensibilitá constitue un factor decisiv de superioritá super li skematic systemas. Un traduction in Esperanto aperte li finn tresor literari a 20 mill Esperantistes. Un traduction in Occidental aperte it al tot monde cultivat, a decenes de milliones. Institute Occidental intente editer un extrate de ti deliciosi poesie.

**FRANCIA.** Continua aparir li revues « Class-combatte », redaction G. Poujet, Isles-sur-Suippe, e « Sempre », redaction J. Toublet, 21, rue de Loos, Paris 10<sup>me</sup>, Postchec-conto Paris 1844-58. Ples corecter li adresse indicat in ultim Cg B.

« Nia Gazeto », decembre 1937 contenet un articul sur li tot unesim pagine (formate A 3) del famosi Esperanto-autoritá prof. Camille Aymonier pri li question « Qui es li autor de Ido », un sympatic recension del « Ver Historie » de Ric. Berger. Li recensent junte interessant psykologic detalies pri sr De Beaufront.

**ITALIA.** « Italia Filatelica », nro 3, del januare 1938, organ trimestral de colectores, contene un articul in Occidental de dr. Emilio Dal Martello e un anuncia in Occidental por Occidental. Interessates mey tornar se al redaction : Giuseppe Bevilacqua, Pavullo nel Frignano, Abbonament annual extra Italia 1 Dollar, specimen 1 respons-cupon. It es intentionat far « Italia Filatelica » oficial organ del Italian Occidental-movement.

— « Fronte Unico » del 10. febr. publica un corespondentie pri politic questiones in Occidental inter dr. Dal Martello e sr W. Rädler, Germania.

**SVEDIA.** Li considerabil crescentie de nor movement in Svedia fat recomendabil li institution de un propri sved organ por li propaganda de Occidental. In februario 1938 aparit li unesim numero de « LI SVED OCCIDENTALIST » oficial organ del Occidental-movement in Svedia. It apari 4 vezes per annu, 8 pagines formate de Cosmoglotta, arangement e print es inreprochabil. Li articules (in parte con textus paralel in sved e Occidental) ne es signat. Styl e argumentation trahi autores de grand propagandistic experientie e rich ye util idées. Li abbonament annual custa 0.75 öre o 0.85 SFr. Redaction-Administration : Sved Occidental-Federation, Box 171, Stockholm 1, Postgiro 70 315. Li abonation del revue es calidmen recomendat a omni Occidental-propagatores. Li partes in Occidental e li clar disposition del textus e tabelles comparativ con skematic systemas de L.I. permesse anc a coidealistes ne comprendent sved hauster inspirationes por lor propaganda ex un fonte experit e habil.

— Un original comenda. In comensa de februar li Institute Occidental ricevet ex Svedia un disco de grammofon e un serie de Bons, sin alcun indication pri li expeditor o li scope. Ludet, li disco revelat su secrete, per un textu parlat in Occidental e clar-men comprensibil :

« Occidentalia, li ottesim februario mill e nin cent e triant e ott. Institute Occidental, Chapelle. Ples inviar me strax Spiritu de Occidental secun li separat anuncia e in plu un insigne, to es un tilde. Tri francs ottanti centesimes sviss es adjuntet in Bons. Ples accepter mi cordial salutationes. Andreas Lindström. — Berg e Wennerström saluta. »

Noi mersia sr Lindström sincermen pro su original comenda !

**SVISSIA.** Ye li 11. februario, Prof. A. Debrunner, presidente del Committee for Agreement de IALA e professor del univertate de Bern, fat un discours pri « Nov organisatori tentatives vers li unic lingue international auxiliari ». Professor D. exposit brevimen li situation present del L. I. e raportat pri li intentiones e li activitá de IALA.



# OCCIDENTAL - LITERATURA

\* Editiones mimeografat.

	Afrancat
<b>In anglés :</b> * RAXWORTHY A. S.: Introductory Grammar .....	SFr. 1 —
* Dr KEMP: Dictionarium Angles-Occidental (in preparation).	
* FEDERN - KEMP - HAISLUND: Occidental-English vocabulary .....	» 0 60
<b>In dan :</b> FEDERN-HAISLUND: Occidental-Dansk Ordbog .....	» 0 50
<b>In finn :</b> T. TATTARI: Occidental Kansainvälinen Kieli .....	» 1 50
<b>In francés :</b> L.-M. de GUESNET: L'Occidental (principes de la langue) .....	» 0 30
* Qu'est-ce que l'Occidental ? .....	» 0 30
* Aux Espérantistes .....	» 0 30
BERGER: L'Occidental en 5 leçons .....	» 0 40
» * Dictionnaire Français-Occidental, 316 p., en cahiers .....	» 5 —
» Solidement relié .....	» 9 80
» * Index Occidental-Français .....	» 0 50
» * Historiettes in Occidental (avec traduction française) .....	» 0 60
CHANAUD: Index Français-Occidental au Radicarium .....	» 0 80
<b>In german :</b> DIVERS AUTORES: « Occidental, die Weltsprache », 256 S. Leinen 4.50, Geh. .....	» 3 —
* BLASCHKE: Der Kampf um die Weltsprache .....	» 0 50
JANOTTA: Leitfaden der Weltsprache Occidental .....	» 1 —
OCCIDENTAL, Begründung, Grammatik, Wortbildung .....	» 0 50
GÄR: Wörterbuch Deutsch-Occidental. Gebunden 5.30, Brosch .....	» 2 50
* Dr SCHRAG, Dr ASCHWANDEN, Dr NIDECKER: Die moderne Weltsprache .....	» 0 50
* Historiettes in Occidental (con trad. german) .....	» 0 60
FEDERN: Occidental-Grundlage für einen Internat. Terminol. Code .....	» 0 50
<b>In italian :</b> * J. RITTER: Curs de Occidental por Italianes .....	» 0 30
* Dr Ing. DAL MARTELLO: Corso in 3 lezioni per corrispondenza .....	» 0 60
* FEDERN-RITTER: Vocabolario Occidental-Italiano .....	» 0 30
<b>In hispan :</b> FEDERN-PEDRERO: Clave Occidental-Hispan (in preparation).	
CEBREIROS: Grammatica in hispan (in preparation).	
VARELA: Curs per correspondentie in 5 lecciones .....	» 0 50
<b>In portugals :</b> * Curs de Occidental .....	» 0 30
<b>In ruman :</b> ESCHENASY: Grammatica in ruman .....	» 0 60
ESCHENASY-HANT: Vocabularium Occidental-Ruman (in preparation).	
<b>In russ :</b> KOFMAN: Grand dictionarium russ-occidental (pret a printar).	
E. DE WAHL: Occidental por international relationes (clave 8 p.) .....	» 0 20
<b>In sved :</b> Dr C.-E. SJOSTEDT: Occidental de internationella ordens språk .....	» 0 40
Mag. phil. A.-Z. RAMSTEDT: Occidental, ett västerländskt kulturspråk .....	» 0 30
» Nyckel till Occidental .....	» 0 80
Dr B. BLOME: Lärobok i Occidental, 72 p. ....	» 1 80
Dr C.-E. SJOSTEDT: Dubbel Occidental-ordbok, 98 p. ....	» 1 80
C.-W. von SYDOW: Occidental eller Esperanto .....	» 0 50
K. SEGERSTAHL: Hjälpsspråksfrågen .....	» 0 40
<b>In tchecoslovac :</b> O. MULTIS: Problem reci mezinárodní .....	» 0 50
J.-A. KAJŠ: Učitel svetomluvy .....	» 0 50
J. PODOBSKY: Co je Occidental ? .....	» 0 20
KAJŠ-PODOBSKY-SVEC: Slovník Česko-Occidentalský .....	» 1 50
J.-A. KAJŠ: Occidental, moderné rec mezinár .....	» 1 —
* SVEC - PODOBSKY - FEDERN: Slovník Occidentalsko-Cesky .....	» 0 60
<b>Publicationes por esperantistes :</b> Occidental aŭ Esperanto .....	» 0 30
Vocabularium Esperanto-Occidental e Occidental-Esperanto .....	» 0 30
Esperanto als Welthilfssprache .....	» 0 20



	Afranca
<b>Publicationes in Occidental</b> : AMICIS : Manuel Menendez (Ovre 6) .....	SFr. 0 60
BALMONT K. : U es mi hem ? (Ovre 2) .....	» 0 60
BERGER : Curs de Occ. in Occ. ....	» 0 50
» Historie del Lingue international (Cosm. nr. 116) .....	» 0.50
CORDONNIER : Original stenografie de Occidental .....	» 1 40
* CREUX : Stenografie Duployé por Occidental .....	» 1 —
* » Rythmica in Occidental .....	» 0 60
* CREUX e BERGER : Li origines de Occidental .....	» 0 80
DIVERS AUTORES : Crestomatie de Occidental .....	» 1 50
* FEDERN Ilmari : Lexico Occ.-Occ (in preparation) .....	» 6 50
De C UESNET : Manuale de conversation .....	» 0 40
GUILBERT-DEMINGER : Vocabularium Occ.-F.A.G. (por li tomes 1-6 de Ovre) ...	» 0 75
* HEINI : Li via al prosperità .....	» 0 50
* Ing. HOERBIGER : Quo Occ. presenta al german ingeniero .....	» 0 50
* Ing. JANOTTA : Construction de un terminologic code .....	» 0 30
JANOTTA : Julius Lott, precursor de Occidental .....	» 1 20
* LITTLEWOOD : Vers un lingual instruction plu rational .....	» 0.50
MASARYK : Democratie e Humanità (Ovre 5) .....	» 0.45
PIGAL : Essentie de Occidental (Cosmoglotta Nr. 56) .....	» 0.50
PODOBSKY J. : Li astres del Verne (original poemas) .....	» 0.80
POE : Un descense in Maelstrom (Ovre 4) .....	» 0.60
R. ROLLAND : Europa e Asia, con vocabularium (Ovre 1) .....	» 0.60
TAKUR : Nationalism in Occidente .....	» 1.10
E. de WAHL : Radicarium directiv in 8 lingues .....	» 2.50
» Spiritu de Occidental, 128 p. ....	» 2. —
Ancian collectiones de Cosmoglotta. Secun li annus ..... de fr. 2. — a	» 15 —
Ancian collectiones de Helvetia, per annu .....	» 2 —
<b>Divers</b> : SKÖLD-PODOBSKY : Tri canzones. Du canzones (por un voce e piano) chascun	» 1.50
Prospecte in Occidental por adjunter in lettres, 10 ex. gratuit ; chascun in plu .....	» 0.03
Covertes, postcartes con propaganda-textu, 100 ex. ....	» 1.50
Marcas glutinabil, 100 ex. ....	» 1. —
Insigne .....	» 1.50
Omni ti libes es recibibil de : Institute Occidental, CHAPELLE (Vd), Postchec-contos : Lausanne	
II.1969 ; Berlin 1683 36 ; Bruxelles 3504 45 ; Copenhag 269 72 ; Paris 1765 46 ; Stockholm 74 395.	

## COSMOGLOTTA

**CONDITIONES DE ABONNAMENT.** Li precie de un simplic abbonament es li correspondent valore de Fr. 4.— sviss o 13 respons-cupones. Ti quel misse Fr. 7.— sviss receive 3 exemplares (abbonament de propaganda). Li precie del abbonament in li moné del divers landes es indicat sur li ultim pagine de chascun numero. — Li abbonament a Cosm. es annual, departe del 1-esim de chascun mensu e continua til li scrit revocation del abonate. On posse inviar li abbonament al secuent adresses :

- ANGLIA : H. D. Akerman, 12 Ollerton Road, New Southgate LONDON, N 11.  
Leonard Beer, 40 St. Rule St., LONDON, S. W. 8
- AUSTRIA : Occidental Club Progress, Ing. A. Reichert, Hebragasse 9, WIEN IX. (pch. Wien B 29 460)
- BELGIA : Institute Occidental, CHAPELLE (Vd), Svissia (Pch. Bruxelles-Brussel 3504.45).
- CUBA : Bonneval e Fuentes, Arguelles 204, CIENFUEGOS.
- DANIA : Institute Occidental (Vd), Svissia (pch. Köbenhavn 269 72).
- ESTONIA : Kosmoglott, Eha 10, TALLINN.
- FINNLAND : J. H. Haukkaupuro, Steniuksen tie 15, HAAGA.
- FRANCIA : L.-M. de Guesnet, 83, Rue Rochechouart, Paris 9 (pch. Paris 26437).  
Institute Occidental, CHAPELLE (Vaud), Svissia (Pch. Paris 1765 46).
- GERMANIA : Occidental-Buro, CHAPELLE (Vd), Svissia (Pch. Berlin 1683 36).
- HISPANIA : C. Varela, Macia 5, FIGUERES (Cat.).
- ITALIA : Dr Ing. E. Dal Martello, GRISIGNANO di Zocco VICENZA.
- NEDERLAND : H. Littlewood, v. Panhuysstr. 18 A., GRONINGEN.
- PORTUGAL : R. de Beça e Melo, Av. Sac. Cabral 56, PENAFIEL.
- RUMANIA : Aurel Eschenasy, Calea Brestei 27, CRAIOVA.
- TCHECOSLOVAKIA : Jos. Svec, Skroupova 2, PRAHA VII (Pch. Praha, Nr. 9.438).
- SVEDIA : Sved Occidental Federation, Box 171, STOCKHOLM (pch. Stockholm 70 315).  
» Institute Occidental, CHAPELLE (Vd), Svissia (pch. Stockholm 74395).
- SVISSIA e altri landes : Institute Occidental, CHAPELLE (Vd), (pch. II. 1969).
- U. S. A. : M. K. Gardner, 803 State Street, MADISON (Wis.)